

05 DEC 2000

Agong-Thailand

AGONG HANTAR PERUTUSAN TAHNIAH KEPADA RAJA THAILAND

KUALA LUMPUR, 5 Dis (Bernama) -- Yang di-Pertuan Agong Sultan Salahuddin Abdul Aziz Shah menghantar perutusan tahniah kepada Raja Bhumibol Adulyadej sempena hari keputeraan ke 73 baginda hari ini yang juga merupakan hari kebangsaan Thailand.

Dalam perutusannya Yang di-Pertuan Agong mengimbas kembali lawatan negara baru-baru ini ke Thailand dengan baginda dan Raja Permaisuri Agong Tuanku Siti Aishah menyaksikan sendiri usaha-usaha Raja Bhumibol serta sumbangan dan dorongannya yang telah banyak membantu Thailand mengharungi waktu-waktu yang sukar.

"Kami yakin yang hubungan utuh dan semangat persahabatan antara kedua-dua negara akan diperkukuhkan lagi demi manfaat bersama rakyat kedua-dua negara," titah baginda dalam satu kenyataan yang dikeluarkan oleh Wisma Putra.

Perdana Menteri Datuk Seri Dr Mahathir Mohamad dalam perutusan kepada rakan sejawatannya di negara itu Chuan Leekpai, mengulangi komitmen Malaysia untuk meningkatkan lagi hubungan rapat antara kedua-dua negara.

"Sebagai jiran rapat Thailand, penduduk Malaysia berbangga untuk turut sama berkongsi kebanggaan dan kegembiraan pada hari yang penuh bermakna ini," kata beliau.

Menteri Luar Datuk Seri Syed Hamid Albar dalam perutusan kepada rakan sejawatannya Dr Surin Pitsuwan berkata, sejak bertahun-tahun Malaysia dan Thailand telah menikmati hubungan ramah mesra atas semangat kejiranan.

"Ia hubungan yang telah matang dan telah menjana kerjasama dan persefahaman dua hala yang penuh bermakna," kata beliau.

-- BERNAMA

AFY AZZ PR